



蝦公腳

寒天過撤，天時漸漸燒暖，春風吹來百花開。山頂清香雪白个梅花開煞，跔核紅放放个山櫻花、新娘色个桃花、大紅色个杏花、歸頭榮榮蓬白个李花接力開，也錫來蜂、蝶、花籬蛄迂來迴去，還有跳上跳下絡食个畫眉、瓦雀，同恬靜个山排打扮去靚妮妮、鬧熱濟借。

春天在莊下路肩草埔、樹下草坪也看得著紅个、黃个、吊菜色个各色各樣个草花，其中盡打眼个斯係一蕊一蕊花心黃黃、花皮白雪雪个草花，這種草斯係「咸豐草」，也有人講佢係「鬼針草」，客話安做「蝦公腳」。開花恁得人惜个草仰脣會喊佢「蝦公腳」呢？因致厥花謝撤，會變做青黃色个草籽，過加幾日這草籽熟咧，會歸粒四散開來，像一支一支細細烏烏个蝦公腳。若有人對該過，褲腳磨著佢，該細細个蝦公腳斯黏核人个褲腳，跔人滿哪去。想來，這係一種當有智慧个草種，知得仰脣毋使開錢斯同自家个子女送去旅行，還藉恁泥个方式，同草籽散出去、遛開來。

細漢个時，阿哥好撩噹，放學共下行轉屋家个時節，挑故意摘青黃色个蝦公腳草籽來擲佢。該草籽一粒一粒黏在背囊，又癢又虐削，手又撥佢毋著實在毋得結煞。佢也摘草籽來還背佢，無奈何，人矮腳短逐佢毋著、也擲佢毋著，毋甘願譴滋滋轉去投阿姆，阿哥斯分阿姆罰洗一禮拜个碗。毋過無幾久阿哥又毋記得分人罰个艱苦，又來撩佢，輒輒搥都佢哇哇滾緊噉。蝦公腳斯係阿哥同佢冤仇結盡深个童年記憶。

蝦公腳生命力當強，伐撤無幾久又會綻出來，當拚斯遛都滿哪去，所以打林个人當惱佢。尤其像阿爸長在做事轉夜、痲業業咧，還愛坐在簷簷下擇歸褲腳个蝦公腳，擇淨咧正使得換落來洗，若無放共下个衫褲做下會黏都滿哪係，正經當搥煞人，吾等細人也輒輒分大人喊去搥擇蝦公腳，好得阿爸大勢都會用弓蕉刀先同褲腳拷拷嚟，正毋使拈蝦公腳拈去毋記得。

蝦公腳還有清熱同利尿个功效，熱天暑氣重，阿爸、阿姆在山頂做林事輒輒會熱著，阿媽斯會去路肩屋背擲幾頭蝦公腳，洗淨連根、連梗剝剝嚟，放入大鑊肚炆，先煮滾、過用細火炆、炆畀恹恹，正同粕撈撤加兜赤砂糖放畀涼，一儕一碗烏疏疏个青草茶淋落肚，第二日人斯加已鬆爽咧！成半下，厥等也會裝入茶罐帶去山頂準茶淋。佢也識淋過蝦公腳煮个青草茶，明明阿姆放當多糖咧，一落嘴還係苦都起雞嫲皮，吞毋落又毋敢呸撇，目汁含核無結無煞，臨尾，還係硬吞落去，歸嘴苦蒂蒂，到今恹著還當驚。

這下看著蝦公腳草，該刻在心肝肚苦督个青草茶味、該又惱又愛个青草籽、還有黏在阿爸褲腳个蝦公腳，做下係吾童年難忘个篇章。

作者：徐姿華

☆詞彙學習☆

【新娘色】sin⁺ ngiong^ˇ sed^ˆ：粉紅色。

【撩噹】liau^ˇ dang⁺：捉弄、逗弄。

【虐削】ngiog^ˆ siog^ˆ：皮膚接觸到不柔順的衣物，所引起身心的不舒服。

【還背】van^ˇ poi^ˆ：奉還。

【譴滋滋】kien^ˆ zii⁺ zii⁺：非常生氣。

【拷拷嚟】kau^ˇ kau^ˇ le^ˆ：刮一刮。

【炆畀恹恹】vun^ˇ bi^ˇ tiam^ˆ tiam^ˆ：長時間燜煮到食物的味道完全釋出。